



Stiafen Venzin

27.12.1922 - 03.04.2001

Beinmarvegl dils 3 d'avrel 2001 ha il Tutpussent clamau tier el il Stiafen Venzin da Selva. Sco quei ch'el ei vivius, ha el era priu comiau dil mund terrester - en totta tgeuadad e mudestadad. Ils davos onns han adina puspei malsognas mulestau il Stiafen. Dallas liungas spassegiadas cul tgaun ha el stuiu desister, quei che ha tuccau el fetg. L'entschatta dil meins fevrer 2001 eis el ruclaus maltscheccamein e stuiu serender el spital. Cura ch'el ha saviu returnar dil spital eis el buca propri serevegnus pli.

Il Stiafen ei naschius a Selva sco 3. affon. Ensemen cun ses geniturs Sep Lorenz Venzin e Barla Catrina nata Loretz e ses 9 fargliuns ha el passentau ina biala affonza. Sco ei descha da gliez temps, ha el gia baul stuiu emprender da segidar el menaschi puril. Il vitg da Selva era fetg bein populaus, aschia ch'ils affons savevan frequentar las scolas el vitg. Suenter haver terminau las scolas ordinarias eis el segidaus cun ils geniturs e fatg il pur. Da tut temps stueva el ir sin la fadigia per aschia garantir in'existenza mudesta. Sco manual e miradur eran sias habilitads appreziadas.

Ils 11 da zercladur 1949 ha il barschament da Selva destruiu la casa paterna ed igl entir fatg. Il fiug era ruts ora entadem il vitg. Cunquei che la casa sesanflava empau sur il vitg, han els ditg cartiu che l'atgna casa davanti buca in'unfrenda dallas flomas. Il vent ha denton adina pertau vinavon il fiug e cura che las grondas caliras han interrutt la lingia d'aua, eis ei mo pli stau ina damonda dil temps tochen che la casa ei barschada. Ils muvels eran sin pastira ed ein aschia restai als convischins da Selva. Cun grond engaschi, curascha e cun il grond agid dalla entira populaziun han els puspei baghegjau ina casa nova.

Ensemen cun siu frar Benedetg ed il convischin Fidel Venzin han els fundau anno 1959 ina societat aczunara e baghegjau in runal cun ina lunghezia da ca. 900 m sill'Alpsu alla spunda dil Calmut. La pli gronda part dallas lavurs han els sez eregiu cun grond inschign ed engaschi. Pli tard ei il runal vegnius spustaus, prolongius e rinforzaus. Suenter entgins onns han ils dus frars acquistau las aczias digl aczunari Fidel Venzin, aschia ch'els eran aunc persuls patrun digl indrez. Duront igl unviern habitavan els per gronda part en ina baracca sut la staziun dil runal. Entochen igl onn 1982 han els dirigiu quella fatschenta cun bien success.

Era duront la stad han ils dus frars adina barhau e tschercau novas pusseivladads per ina fadigia. Aschia ein els sefatschentai d'ina tratga da pèschs dadens Sutcrestas. L'aua ei vegnida menada da Tschamut el liug e per ils lags han el stuiu far gronds scavaments. Ulteriuramein ha il Stiafen baghegiau dado Selva in ualèr ed entschiet sco apicultur. Sper la laver tgirava er era il hobby sco organist dalla baselgia da Nossadunna. Empriu da sunar l'orgla ha el tier la Lucia Venzin (sora da Duri Battesta Venzin da Rueras). Plinavon segidava el cun la pleiv sco ugau dalla baselgia. Ses duns e sia cordialitat vegnevan apprezzai.

La primavera digl onn 1991 bandunan il Stiafen e la Maria il vitget da Selva e serendan a Sedrun. Els han buca priu bugen comiau da Selva. Il Stiafen serendeva adina puspei a Selva per aschia levgiar empau ils sentiments da schar encrescher.

Ensemes cun las duas soras Maria e Rusina, las qualas han adina giu bien quitaud el, ein els secasai ella casa En Canorta. Il december digl onn 1999 sto el serender en casa s. Vigeli. Cun grond quitaue premura eis el vegnius tgiraus tochen tier sia mort. Lein sperar ch'il Stiafen anfli ussa il bein meritau ruaus perpeten.



Consultaziun davart il plan directiv regiunal

A caschun dalla sesida dils 21 da zercladur 2001 ha la suprastanza dalla Corporaziun da vischnauncas concludiu da metter en consultaziun l'adattaziun dil plan regiunal directiv nr. 2.540 «Concept plazzas da golf» e quei naven dils 29 da zercladur 2001 entochen ils 30 da fenadur 2001.

Las documentaziuns che consistan dil plan directiv nr. 2.550 «concept plazzas da golf», sboz adattaziun 2001, san vegnir consultadas duront il temps da biro en stanza da spetga dalla Corporaziun da vischnauncas Surselva, Casa Cumin, 3. alzada, Glion.

Posiziuns ein d'inoltrar a secret ed ein d'adressar alla:

Corporaziun da vischnauncas Surselva, Caum postal 180, 7130 GLION.

Glion, ils 26 da zercladur 2001

**CORPORAZIUN DA VISCHNAUNCAS
SURSELVA
Il secretariat regiunal**